



卷一

# 留鳥

民謠曲

## 芒噹丟仔——台灣鷓鴣

芒噹丟（tiuh）仔一起飛  
菅芒花就叮叮噹噹  
寒--人有夢，睏去的目睷  
閣會搖咧搖（tiuh）咧  
若屨窗，看風景，咧追人  
人追火車，親像一隻芒噹仔  
愈拋愈遠  
躑躅空躑躅空  
是按怎？咧追咧飛  
伊都丟丟噹仔

芒噹仔一起飛  
一條線軟  
懸懸低低像浮浪  
牽風半空中，一逝一逝歌譜  
拔長長，伊都  
丟丟噹仔  
過磅空過磅空

回鄉的人  
目睷掣咧掣咧耳空撥撥  
較夢都夢冬

瘦抽瘦抽的鳥隻  
親像牽手的指頭仔  
遐爾仔幼！飛來飛去空中刺繡  
一个葫蘆袋仔  
愈來愈粗的腹肚  
伊都芒噹仔岫

PS/

芒噹丟（tiuh）仔（台灣鷓鴣）的岫（鳥巢）外形像葫蘆袋仔，非常幼秀（精細），大多數芒草編織。

## 思啊相枝——鴿子

粉鳥仔自你手心飛去

思啊--想--起

愈去愈遠

一山過一山

睇一條線

你摸線頭

一彈

月琴隨回聲

有影，若像親情

恆春定定，看海照鏡

無講按怎

二面近近爾爾

是按怎

粉鳥會認毋著相思的路線

飛轉來的明信片

攏是羅馬教堂大埕

人用物件咧啞

這款鳥仔的形影

啊！若是閣飛去北京

你彈月琴

聽嘛

傷細聲

思啊相枝

## 仝厝頂夢相向——麻雀

鑽出鑽入的厝角鳥仔  
鳥仔聲扛竹籠（long5）仔  
叮叮咚咚  
竹籠仔扛塗整厝  
親像扛轎  
搖咧搖咧 咧 咧  
咻咻叫  
毋驚做風颱  
三代五代攏圍佇厝內  
一个岫鋪草蓆仔  
伊睷阮睷  
攏蓋仝一重  
雲煙厝頂  
伊的夢阮的夢  
攏平長  
眠床相向  
同齊等天光  
看佬遠

## 出火！起鉞——燕仔

排列倚佇電線的燕仔  
一逝一逝若五線譜，定定  
等看著人 peh 上電火柱  
音符起飛，規逝  
出火  
燒燒花花  
鳥仔母看無  
台電的是咧創啥貨  
  
做岫躡人亭仔跤  
店面壁角若吊一个錢袋仔  
等人客，一入來  
袋仔喙隨搖，規岫  
起鉞（giang）  
叮叮噹噹  
鳥仔囡咧聽？早餐是按怎  
愛閣有銀角仔聲

## 烏斫仔貯豆油——喜鵲

客鳥生做啥物款？親像警車

一陣風飛過的色緻

你印象干焦白白

其實規隻大部份烏色

內底若是閣載烏底--的

伊飛愈緊愈遠

你的視線拖愈長

記持

煞愈短

賭白白

客鳥出生的苦毛仔嘛是

啷啷白白，大隻才翻烏

到會飛，展翅就聞日

伸手就遮天

盡靠靠烏底的身軀，外口

披一領深藍大衣

翅仔尾掌指頭仔，攏套

白色手橐仔，一飛起來

雲隨抹烏，若落雨

看天破糊糊

彼陣熱--人

討海人有戴草笠仔無穿鞋

欲走過一大片的沙埔

比過火儀式較恐怖

攏愛先從入去麻黃仔跤，遮蔭

頭殼頂若閣有客鳥岫

逐家輪流秋清

按呢習慣講致蔭

若眷村的鳥仔岫袂烏有

就像烏斫仔貯豆油

PS/

喜鵲：苗栗縣鳥，台語叫〈客鳥〉，也稱〈蔣鵲〉，相傳 1775 年蔣元樞上任台灣知府時位唐山帶來的。